

**PRAVILNIK O RADU STUDENTSKOG VIJEĆA VISOKE ŠKOLE ZA
FINANSIJE I RAČUNOVODSTVO FINra TUZLA**

**PRAVILNIK O RADU STUDENTSKOG VIJEĆA VISOKE ŠKOLE ZA
FINANSIJE I RAČUNOVODSTVO FINra TUZLA**

Na osnovu člana 12. Statuta Studentskog vijeća Visoke škole za finansije i računovodstvo FINra Tuzla, Upravni odbor Studentskog vijeća FINra na sjednici održanoj dana 07.03.2020. godine, donosi:

PRAVILNIK O RADU STUDENTSKOG VIJEĆA VISOKE ŠKOLE ZA FINANSIJE I RAČUNOVODSTVO FINra TUZLA

I OPŠTE ODREDBE

Član 1.

(Predmet Pravilnika)

Pravilnikom o radu Studentskog vijeća Visoke škole za finansije i računovodstvo FINra Tuzla (u daljem tekstu – Visoka škola FINra) definiše se način rada Studentskog vijeća i njegovih organa, odgovornosti tijela i članova Studentskog vijeća, te druga pitanja od značaja za rad Studentskog vijeća FINra.

Studenti Visoke škole FINra organizuju se u Studentsko vijeće s ciljem da zastupaju interese studenata, i daju svoj doprinos ostvarivanju obrazovnih, akademskih, kulturnih i ostalih društvenih potreba, a na osnovu demokratskih principa u skladu sa propisima.

Odredbe ovog Pravilnika obavezne su za sve članove Studentskog vijeća FINra (u daljem tekstu – Studentsko vijeće) i druge osobe koje sudjeluju u njegovom radu.

Član 2.

(Vijeće studenata)

Studentsko vijeće je studentsko izorno predstavničko tijelo koje štiti interese studenata, te preko svojih predstavnika sudjeluje u radu i odlučivanju organa Visoke škole FINra.

Djelovanje Studentskog vijeća temelji se na načelu jednakosti svih studenata Visoke škole FINra, i isključuje svaku diskriminaciju po bilo kojoj osnovi u odnosu na pravo na članstvo i rad u Studentskog vijeća, tijelima Studentskog vijeća, i organima Visoke škole FINra.

Članstvo u Studentskom vijeću, kao i sudjelovanje u organima Visoke škole FINra zasniva se na dobrovoljnoj osnovi.

Član 3.

(Status)

Status studentske organizacije stiče se upisom u evidenciju studentskih organizacija na Visokoj školi, rješenjem Direktora kojim se potvrđuje da organizacija udovoljava uslovima propisanim Zakonom i Statutom.

Studentsko vijeće se može pridružiti asocijaciji studentskih predstavničkih tijela u BiH putem kojih se ostvaruje članstvo u međunarodnim organizacijama i asocijacijama studenata.

Izabrani predstavnici Studentskog vijeća predstavljaju studente Visoke škole FINra u sistemu visokog obrazovanja, te u odnosima sa drugim studentskim asocijacijama u BiH i inostranstvu.

II POSEBNE ODREDBE

Član 4.

(Organi Studentskog vijeća)

Organi Studentskog vijeća su:

- 1) Upravni odbor;
- 2) Predsjednik;
- 3) Potpredsjednici i
- 4) Sekretar.

Upravni odbor Studentskog vijeća čine studentski predstavnici izabrani iz reda sve četiri studijske godine Visoke škole FINra, čiji mandat traje jednu godinu.

Upravni odbor, u pravilu, ima 13 članova.

Broj članova Upravnog odbora može se proširivati, o čemu se odlučuje posebnom odlukom.

Predsjednika, potpredsjednika i sekretara Studentskog vijeća bira Upravni odbor na mandat od jedne godine, iz reda članova Studentskog vijeća.

Predsjednik i potpredsjednici zastupaju Studentsko vijeće u tijelima Visoke škole FINra, a u slučaju njihove spriječenosti, zastupanje mogu preuzeti drugi predstavnici Studentskog vijeća koje odredi Upravni odbor.

Članovi Studentskog vijeća mogu imenovati svoje posebne predstavnike u organe i tijela Visoke škole FINra, o čemu donose posebnu odluku na sjednicama Upravnog odbora.

Član 5.

(Nadležnosti Upravnog odbora Studentskog vijeća)

Upravni odbor ima sljedeće nadležnosti:

1. Bira i razrješavanja predsjednika, potpredsjednike i sekretara;
2. Utvrđuje i donosi Pravilnik o svom radu;
3. Donosi opće akte iz domena svoje nadležnosti;
4. Donosi plan i program Studentskog vijeća na čelu sa predsjednikom;
5. Imenuje radna tijela Studentskog vijeća;
6. Brine o kvaliteti standarda studenata, posebno u domenu kvalitete studijskog procesa i ostvarivanju studentskih prava;
7. Podnosi prijedloge o unaprijeđenju kvalitete studijskog procesa putem svojih predstavnika;
8. Obavlja i druge aktivnosti od značaja za studente.

Član 6.

(Nadležnosti predsjednika)

Predsjednik Studentskog vijeća ima sljedeće nadležnosti:

1. Zastupa i predstavlja Studentsko vijeće u organima Visoke škole FINra i prema trećim licima;
2. Predlaže Plan i program rada Studentskog vijeća;
3. Saziva i predsjedava sjednicama;
4. Predlaže dnevni red;
5. Predlaže voditelje radnih tijela Studentskog vijeća;
6. Obavlja i druge poslove određene zakonom, statutom i općim aktima Studentskog vijeća.

Član 7.

(Odgovornost u radu predsjednika)

Za svoj rad, predsjednik odgovara Studentskom vijeću, odnosno Upravnom odboru Studentskog vijeća.

Predsjednik Studentskog vijeća sa funkcije može odstupiti pismenom ostavkom.

Predsjednika s dužnosti može razriješiti Upravni odbor Studentskog vijeća na prijedlog najmanje jedne trećine članova Vijeća studenata, u sljedećim slučajevima:

1. Ako se ne pridržava propisa i općih akata Studentskog vijeća i Visoke škole FINra;
2. Ako ne izvršava odluke Studentskog ili postupka protivno njima;
3. Ako svojim ponašanjem, nemarnim i neodgovornim izvršavanjem obaveza naruši ugled Visoke škole FINra;
4. Ako u obnašanju dužnosti prekorači svoja ovlaštenja;
5. Iz drugih opravdanih razloga.

O prijedlogu za razrješenje predsjednika odlučuje Upravni odbor Studentskog vijeća, i to natpolovičnom većinom glasova prisutnih članova.

Član 8.

(Potpredsjednici)

Na prijedlog predsjednika, Upravni odbor bira dva potpredsjednika iz reda članova Studentskog vijeća.

Nadležnosti potpredsjednika su:

1. Zamjenjuju predsjednika za vrijeme njegove odsutnosti u svim poslovima i ovlastima;
2. Pomažu predsjedniku u radu i razvoju Studentskog vijeća;
3. Obavljaju druge poslove iz nadležnosti Studentskog vijeća u skladu sa ovim pravilnikom, statutom i općim aktima Studentskog vijeća.

Potpredsjednici Studentskog vijeća mogu biti razriješeni sa funkcije na način i pod uslovima propisanim za razrješenje predsjednika Studentskog vijeća.

Mandat potpredsjednika odgovara mandatu predsjednika.

Član 9.

(Sekretar)

Sekretara Studentskog vijeća, na prijedlog predsjednika, bira i razrješava Upravni odbor.

Mandat sekretara Studentskog vijeća odgovara mandatu predsjednika.

Sekretar ima sljedeće odgovornosti:

- a) vodi zapisnik sa sjednice;
- b) pomaže predsjedniku u radu i obavlja poslove koje mu predsjednik povjeri;
- c) stara se o arhivi Studentskog vijeća.

Član 10.

(Radna tijela)

Studentsko vijeće može, kada se za to ukaže potreba, formirati povremena radna i savjetodavna tijela Studentskog vijeća, odnosno Komisije za različite oblasti djelovanja.

Radna tijela pomažu Studentskom vijeću u realizovanju utvrđenog plana i programa djelovanja Studentskog vijeća, u skladu sa područjima svog djelovanja, i mogu imati najmanje 2 (dva) a najviše 10 (deset) članova.

Djelokrug poslova radnih tijela utvrđuje se odlukom o konstituiranju.

Član 11.

(Klub studenata FINra)

Studentsko vijeće može formirati Klub studenata FINra, kao stalno tijelo vijeća, čija je osnovna funkcija zagovaranje prava i interesa studenata, zaštita i poboljšanje standarda i socijalnog statusa studenata, doprinos razvoju modernog školstva, povezivanje i saradnja sa drugim organizacijama mladih, realizovanje utvrđenih projekata Vijeća, te organiziranje provođenja slobodnog vremena i druženja studenata Visoke škole FINra.

Prostorije za rad Kluba nalaze se u okviru prostorija Visoke škole FINra, a koristit će se za rad, učenje, osmišljavanje i provođenje novih ideja, te druženje i opuštanje.

Član 12.

(Donošenje odluka)

Studentsko vijeće i Upravni odbor Studentskog vijeća donosi odluke na sjednicama.

Svaki član Studentskog vijeća i Upravnog odbora ima 1 (jedan) glas pri donošenju odluka, bez obzira koju funkciju obnaša u Studentskom vijeću i organima Visoke škole FINra.

Studentsko vijeće i Upravni odbor, u pravilu, odluke donosi natpolovičnom većinom glasova prisutnih članova.

Minimalan broj prisutnih članova za donošenje pravovaljanih odluka je $\frac{1}{4}$ ukupnog broja članova Studentskog vijeća, odnosno Upravnog odbora.

Član 13.

(Sazivanje sjednica)

Sjednice saziva i predsjedava Predsjednik, u skladu s ovim Pravilnikom.

Predsjednik Studentskog vijeća dužan je redovito sazivati sjednice Upravnog odbora, i to najmanje jednom u mjesecu.

Dnevni red sjednice predlaže Predsjednik Studentskog vijeća, a utvrđuje Upravni odbor.

Predsjednik Studentskog vijeća saziva skupštinu Studentskog vijeća najmanje jednom u šest mjeseci.

Sjednice Studentskog vijeća i Upravnog odbora SV vodi i usmjerava predsjednik, a u slučaju njegove odsutnosti potpredsjednik vijeća.

U izuzetnim slučajevima odsutnosti predsjednika i potpredsjednika, Studentskim vijećem i Upravnim odborom SV može predsjedavati i bilo koji drugi član izabran natpolovičnom većinom glasova prisutnih članova.

Član 14.

(Zapisnik sa sjednica)

O održanim sjednicama Studentskog vijeća i Upravnog odbora vodi se zapisnik, koji se čuva trajno na način predviđen propisima za čuvanje arhivske građe.

Zapisnik sadrži obavezno sljedeće elemente: vrijeme i mjesto održavanja sjednice, evidenciju prisutnih i odsutnih, dnevni red, zaključke o svakoj tački dnevnog reda, ime zapisničara i predsjednika.

Predsjednik Studentskog vijeća dužan je osigurati da se zapisnik sačini najkasnije sedam (7) dana od dana održavanja sjednice Vijeća.

Zapisnik potpisuju zapisničar i predsjednik Studentskog vijeća.

III ZAVRŠNE ODREDBE

Član 15.

(Tumačenje Pravilnika)

Nadzor nad provedbom ovog pravilnika vrši predsjednik Studentskog vijeća, a tumačenje pravilnika vrši Studentsko vijeće Visoke škole FINra.

Član 16.

(Stupanje na snagu)

Pravilnik stupa na snagu danom donošenja, od kada se i primjenjuje.
Pravilnik će se objaviti na web stranici Visoke škole FINra.

Datum: 07.03.2020.godine

Predsjednik Studentskog vijeća FINra


